

**UDRUŽENJE MUZIČKIH/GLAZBENIH I BALETNIH PEDAGOGA
U FEDERACIJI BOSNE I HERCEGOVINE**

S T A T U T

Sarajevo, mart/ožujak 2026.

Na osnovu člana 18., a u vezi sa članom 14. Zakona o udruženjima i fondacijama ("Službene novine Federacije Bosne i Hercegovine", broj: 45/02 i 85/07), Skupština Udruženja muzičkih/glazbenih i baletnih pedagoga (u daljem tekstu Udruženje) na sjednici održanoj 27. 03. 2026. godine, donosi

STATUT

UDRUŽENJA MUZIČKIH/GLAZBENIH I BALETNIH PEDAGOGA U FEDERACIJI BOSNE I HERCEGOVINE

1. OPŠTE ODREDBE

Član 1.

Statut Udruženja sadrži i propisuje:

- naziv i sjedište Udruženja, oblik i sadržaj pečata i znaka Udruženja
- programske ciljeve i djelatnost Udruženja
- zastupanje i predstavljanje Udruženja
- organe Udruženja, njihove ovlasti, način imenovanja i opoziva, trajanje mandata
- kvorum i pravila glasanja, uključujući i pitanja o kojima se odlučuje kvalificiranom većinom
- funkciju lica ovlaštenog da saziva Skupštinu Udruženja (u daljem tekstu Skupština)
- sticanje i raspolaganje imovinom Udruženja
- način donošenja finansijskog izvještaja i izvještaja o radu Udruženja
- postupak za donošenje Statuta Udruženja (u daljem tekstu Statut), izmjena i dopuna Statuta i drugih opštih akata Udruženja
- uvjete i način učlanjenja, prestanak članstva, kao i prava, dužnosti i odgovornosti članova Udruženja
- uvjete i postupak za pripajanje, razdvajanje, transformaciju ili prestanak rada Udruženja
- način raspodjele preostale imovine u slučaju prestanka rada Udruženja.

Član 2.

Udruženje djeluje u oblasti muzičke/glazbene i baletne pedagogije i umjetnosti na osnovu programa i plana rada.

Član 3.

Gramatička terminologija korištenja muškog ili ženskog roda za pojmove u ovom Statutu uključuje oba roda.

Član 4.

Udruženje u svome radu kao službene jezike ravnopravno koristi bosanski, hrvatski i srpski jezik u latiničnom i ćiriličnom pismu.

2. NAZIV I SJEDIŠTE UDRUŽENJA

Član 5.

Puni naziv Udruženja glasi: UDRUŽENJE MUZIČKIH/GLAZBENIH I BALETNIH PEDAGOGA U FEDERACIJI BOSNE I HERCEGOVINE. (Skrraćeni naziv Udruženja glasi: UMGBP U FBIH).

U kontaktima na engleskom jeziku Udruženje koristi naziv: *ASSOCIATION OF MUSIC AND BALLET PEDAGOGUES IN THE FEDERATION OF BOSNIA AND HERZEGOVINA*

Član 6.

Udruženje ima pečat okruglog oblika promjera 30 mm na kojem polukružno piše:
Udruženje muzičkih/glazbenih i baletnih pedagoga u Federaciji BiH.
U sredini vodoravno piše: Sarajevo.

Udruženje ima znak koji predstavlja stilizovani notni sistem sa violinskim ključem.

Član 7.

Sjedište Udruženja je u Sarajevu, Josipa Štadlera 1.

Udruženje djeluje na području Federacije Bosne i Hercegovine.

3. PROGRAMSKI CILJEVI I DJELATNOST UDRUŽENJA

Član 8.

Programski ciljevi i djelatnost Udruženja su:

- objedinjavanje i koordinacija rada muzičkih/glazbenih i baletnih pedagoga u svrhu afirmacije i unaprjeđenja odgoja i obrazovanja u oblasti muzičke/glazbene i baletne pedagogije i umjetnosti
- interes i stručna pomoć u otkrivanju i razvoju talenata u oblasti muzičke/glazbene i baletne umjetnosti (smotre, takmičenja/natjecanja, festivali, konkursi, i dr.)
- interes i stručna pomoć u razvoju metodičko-pedagoških rješenja u oblasti muzičke/glazbene i baletne pedagogije (savjetovanja, prezentacije, *masterclass*/radionice, seminari, kursevi, i dr.)
- interes i stručna pomoć u oblasti muzičke/glazbene i baletne pedagogije u domeni publicistike i izdavaštva (bilteni, skripte, priručnici, udžbenici, e/knjige, časopisi, audio i video izdanja, i dr.)
- priprema, organizacija i izvođenje obrazovnih i koncertnih programa u oblasti muzičke/glazbene i baletne pedagogije i umjetnosti
- razvijanje saradnje sa institucijama obrazovanja i kulture u domeni muzičke/glazbene i baletne umjetnosti, razmjena iskustava i realizacija zajedničkih projekata, te rješavanje problematike u sferi zajedničkog interesa
- dodjeljivanje nagrada i priznanja Udruženja svojim članovima za postignute rezultate, te predlaganje istaknutih i zaslužnih članova Udruženja za određena društvena priznanja u oblasti muzičke/glazbene i baletne pedagogije, umjetnosti i kulture
- razmatranje svih ostalih pitanja iz domena interesa članova Udruženja a u okviru djelatnosti.

Član 9.

Članovi Udruženja, muzički/glazbeni i baletni pedagozi, reproduktivni umjetnici i kulturni djelatnici, u cilju ostvarivanja svojih programskih zadataka mogu se organizovati u stručne aktive i savjete.

Odluku o osnivanju stručnih aktiva i savjeta donosi Upravni odbor Udruženja.

Član 10.

Udruženje se može povezivati sa drugim udruženjima istog ili sličnog programskog interesa na području Bosne i Hercegovine i inostranstvu.

Udruženje će raditi na organizovanju gostovanja po principu razmjene određenih programa i učešća na manifestacijama kantonalnog/županijskog, federalnog, državnog i međunarodnog značaja.

4. ORGANI UDRUŽENJA, NADLEŽNOST, ZASTUPANJE I ODGOVORNOST

Član 11.

Organi Udruženja su:

- I. Skupština Udruženja
- II. Upravni odbor Udruženja
- III. Predsjednik i dva potpredsjednika Udruženja
- IV. Nadzorni odbor Udruženja
- V. Etički odbor Udruženja

I. Skupština Udruženja

Član 12.

Najviši organ Udruženja je Skupština.

Skupštinu čine delegati sa jednakim pravom glasa koje imenuju članovi Udruženja muzičko/glazbeno-obrazovne ustanove na teritoriji FBiH shodno broju članova Udruženja iz te ustanove i to na način da ukoliko muzičko/glazbeno-obrazovna ustanova ima do 10 članova, imenuje jednog delegata u Skupštinu; ukoliko ima od 11–20 članova imenuje 2 delegata u Skupštinu; ukoliko ima od 21–30 članova imenuje tri delegata u Skupštinu; ukoliko ima od 31–40 članova imenuje četiri delegata u Skupštinu; ukoliko ima 41–50 članova imenuje 5 delegata u Skupštinu; ukoliko ima 51–60 članova imenuje 6 delegata u Skupštinu i ukoliko ima 61 i više članova imenuje 7 delegata u Skupštinu.

Predsjednik Skupštine, predsjednik sa potpredsjednicima Udruženja, predsjednici Upravnog i Nadzornog odbora učestvuju u cjelokupnom radu Skupštine, također sa pravom odlučivanja izvan kvote utvrđene u prethodnoj alineji.

Imena delegata potrebno je dostaviti sekretaru Udruženja najmanje 7 dana prije održavanja Skupštine. Član Udruženja može biti delegiran u sjednicu Skupštine više puta uzastopno.

Skupštini mogu prisustvovati svi članovi Udruženja, ali pravo glasanja imaju samo izabrani delegati.

Skupština imenuje predsjednika Skupštine iz reda članova Udruženja. Do imena kandidata se dolazi putem poziva na kandidaturu ili predlaganjem direktno na Skupštini.

Mandat predsjednika Skupštine je četiri godine, sa mogućnošću reizbora.

Član 13.

Skupština se sastaje po potrebi, a najmanje jedanput godišnje.

Skupština može biti redovna, vanredna i izborna.

Skupštinu saziva i njom rukovodi predsjednik Skupštine u skladu Statutom.

Vanredna Skupština se može sazvati na inicijativu predsjednika Udruženja, Upravnog odbora ili najmanje 1/3 delegata u Skupštini.

Izborna Skupština održava se svake četiri godine, u skladu sa Statutom, radi izbora organa Udruženja.

Rad Skupštine reguliše se Poslovníkom o radu Skupštine koji usvaja Skupština.

Član 14.

Skupština odlučuje i radi u sjednicama.

Skupština može zasjedati ako sjednici prisustvuje natpolovična većina imenovanih delegata.

Skupština odlučuje većinom glasova prisutnih delegata.

Član 15.

Skupština Udruženja:

- donosi Statut, izmjene i dopune Statuta i druge akte određene Statutom
- bira i opoziva predsjednika Skupštine
- bira i opoziva predsjednika i potpredsjednike Udruženja
- bira i opoziva članove Upravnog odbora
- bira i opoziva članove Nadzornog odbora
- bira i opoziva članove Etičkog odbora
- razmatra i usvaja izvještaje koje pripremaju Upravni, Nadzorni i Etički odbor
- usvaja godišnji izvještaj o radu i plan rada Udruženja, kao i finansijski izvještaj
- odlučuje o visini i načinu plaćanja članarine
- odlučuje o udruživanju u saveze, pripajanju, razdvajanju, transformaciji, prestanku rada i drugim statusnim promjenama Udruženja
- odlučuje o svim pitanjima koja nisu u nadležnosti drugog organa.

II. Upravni odbor Udruženja

Član 16.

Upravni odbor Udruženja (u daljem tekstu Upravni odbor) je izvršni organ Skupštine i njoj odgovara za svoj rad.

Upravni odbor ima 15 (petnaest) članova od kojih je jedan predsjednik Upravnog odbora.

Za člana Upravnog odbora može biti kandidiran svaki član Udruženja. Poziv na kandidaturu objavljuje predsjednik Skupštine putem elektronskih medija najkasnije 15 dana prije održavanja izborne sjednice. Prijave kandidata dostavljaju se prema uputi u pozivu najkasnije 7 dana prije održavanja izborne sjednice.

Članove Upravnog odbora imenuje Skupština, iz reda kandidiranih članova, poštujući princip zasupljenosti članova iz različitih kantona/županija.

Imenovani članovi Upravnog odbora između sebe biraju predsjednika.

Upravni odbor se imenuje na period od četiri godine sa mogućnošću reizbora.

Rad Upravnog odbora reguliše se Poslovníkom o radu Upravnog odbora koga usvaja Upravni odbor.

Član 17.

Upravni odbor obavlja slijedeće poslove i zadatke:

- razmatra i utvrđuje prijedlog Statuta, izmjene i dopune Statuta i drugih akata koje usvaja Skupština
- razmatra i priprema materijale u pripremi Skupštine
- razmatra i utvrđuje prijedlog programa rada Udruženja i prati njegovu realizaciju
- provodi planove, aktivnosti, zaključke i druge odluke koje je donijela Skupština
- podnosi Skupštini godišnji izvještaj o svom radu
- donosi i usvaja poslovničke koji bliže određuju rad Udruženja
- formira stručne aktivne, savjete i povremena radna tijela, prati i usmjerava njihov rad

- prati realizaciju djelatnosti Udruženja koje predlažu savjeti i stručni aktivni, te potvrđuje njihove prijedloge i odluke
- u koordinaciji sa predsjednikom Udruženja utvrđuje visinu dnevnice, naknade, honorara, kotizacije, nagrade i slično
- u koordinaciji sa predsjednikom Udruženja bira sekretara Udruženja
- u koordinaciji sa predsjednikom Udruženja donosi odluke o angažmanu stručnih saradnika
- vrši i druge poslove u skladu sa Statutom i aktima Udruženja.

Član 18.

Upravni odbor se sastaje po potrebi, a najmanje tri puta godišnje.

Sjednice Upravnog odbora saziva i njima predsjedava predsjednik.

Sjednice se sazivaju prema programu rada Upravnog odbora.

Sjednica Upravnog odbora može se održati ako joj prisustvuje natpolovična većina ukupnog broja članova, a odluke su punovažne ako za njih glasa većina prisutnih članova Upravnog odbora.

Sjednicama Upravnog odbora mogu prisustvovati predsjednik, dva potpredsjednika Udruženja i predsjednik Skupštine, te predsjednik Nadzornog odbora, koji aktivno učestvuju u radu sjednice, bez prava odlučivanja.

III. Predsjednik i dva potpredsjednika Udruženja

Član 19.

Predsjednika Udruženja imenuje Skupština iz reda članova Udruženja.

Dva potpredsjednika Udruženja imenuje Skupština na prijedlog predsjednika Udruženja.

Mandat predsjednika i potpredsjednika Udruženja traje četiri godine sa mogućnošću reizbora.

Član 20.

Za predsjednika Udruženja može biti kandidiran svaki član Udruženja.

Poziv na kandidaturu objavljuje predsjednik Skupštine putem elektronskih medija najkasnije 15 dana prije održavanja izborne sjednice. Prijave kandidata dostavljaju se prema uputi u pozivu najkasnije 7 dana prije održavanja izborne sjednice.

Član 21.

Predsjednik predstavlja i zastupa Udruženje i brine za zakonitost rada Udruženja.

Prava i dužnosti predsjednika Udruženja su da:

- zastupa i predstavlja Udruženje, te brine o imovini Udruženja
- koordinira radom organa Udruženja, stručnih savjeta, aktiva i dr.
- osmišljava i predlaže aktivnosti na unaprjeđenju djelatnosti Udruženja
- iznosi na Skupštini godišnji godišnji izvještaj o radu i plan rada Udruženja
- aktivno i savjetodavno učestvuje u radu Upravnog odbora do odlučivanja
- predlaže Upravnom odboru angažman stručnih saradnika (pravni i administrativni poslovi, računovodstvo, DTP, IT sektor, i drugi poslovi u okviru djelatnosti Udruženja)
- provodi odluke koje donesu Skupština i Upravni odbor
- obavlja i druge poslove u skladu sa Statutom, i drugim aktima Udruženja, te opštim zakonskim propisima.

Član 22.

Nadležnosti dva potpredsjednika Udruženja prate nadležnosti predsjednika Udruženja u zajedničkoj koordinaciji.

U slučaju spriječenosti ili odsustva predsjednika Udruženja, mijenja ga jedan od potpredsjednika Udruženja uz ovlaštenje predsjednika.

IV. Nadzorni odbor Udruženja

Član 23.

Nadzorni odbor Udruženja (u daljem tekstu Nadzorni odbor) ima 3 (tri) člana, koje imenuje Skupština.

Za člana Nadzornog odbora može biti kandidiran svaki član Udruženja. Do imena kandidata se dolazi putem poziva na kandidaturu ili predlaganjem direktno na Skupštini.

Nadzorni odbor se imenuje na period od četiri godine, sa mogućnošću reizbora.

Imenovani članovi Nadzornog odbora između sebe biraju predsjednika.

Članovi Nadzornog odbora ne mogu biti istovremeno i članovi Upravnog odbora.

Rad Nadzornog odbora reguliše se Poslovníkom o radu Nadzornog odbora koga usvaja Upravni odbor.

Član 24.

Nadzorni odbor vrši nadzor nad cjelokupnim radom Udruženja, a posebno nadzire ostvarivanje planova i djelatnosti Udruženja u smislu njihove realizacije u skladu sa Statutom i zakonom.

Nadzorni odbor jednom godišnje izvještava Upravni odbor i Skupštinu o materijalno-finansijskom poslovanju Udruženja.

V Etički odbor Udruženja

Član 25.

Etički odbor Udruženja (u daljem tekstu Etički odbor) ima 3 (tri) člana koje imenuje Skupština Udruženja na mandatni period od 4 godine.

Za člana Etičkog odbora može biti kandidiran svaki član Udruženja, no poželjno je da to budu članovi sa dogodišnjim iskustvom, autoritetom i doprinosom radu Udruženja. Do imena kandidata se dolazi putem poziva na kandidaturu ili predlaganjem direktno na Skupštini.

Etički odbor se imenuje na period od četiri godine, sa mogućnošću reizbora.

Imenovani članovi Etičkog odbora između sebe biraju predsjednika.

Članovi Etičkog odbora ne mogu biti istovremeno i članovi Upravnog odbora ili Nadzornog odbora.

Rad Etičkog odbora reguliše se Poslovníkom o radu Etičkog odbora koga usvaja Upravni odbor.

Član 26.

Etički odbor razmatra eventualne događaje i okolnosti propisane u članu 44. i 45. ovog Statuta i dostavlja obrazložen prijedlog Upravnom odboru na dalje postupanje.

5. SEKRETAR UDRUŽENJA

Član 27.

Udruženje ima sekretara.

Sekretara po prijedlogu predsjednika Udruženja bira Upravni odbor iz reda redovnih članova Udruženja.

Mandat sekretara Udruženja traje četiri godine sa mogućnošću reizbora.

Član 28.

Sekretar udruženja obavlja poslove u skladu sa posebnom Odlukom Upravnog odbora, a koji se tiču izvršnih, organizacijskih, stručnih, administrativnih i drugih zadataka i obaveza u Udruženju. Istom odlukom se utvrđuje naknada za rad sekretara.

Za svoj rad sekretar je neposredno odgovoran predsjedniku Udruženja i Upravnom odboru.

6. PRAVNI STATUS UDRUŽENJA

Član 29.

Udruženje ima svojstvo pravnog lica u oblasti muzičkog/glazbenog obrazovanja i umjetnosti, te za svoje obaveze odgovara svom svojom imovinom.

7. IMOVINA UDRUŽENJA, ODGOVORNOST ZA OBAVEZE I FINANSIJSKO POSLOVANJE, ČLANARINA

Član 30.

Imovinu Udruženja čine nekretnine i pokretne stvari, imovinska prava i novčana sredstva namijenjena djelovanju Udruženja.

Za svoje djelovanje Udruženje osigurava sredstva od:

- članarina
- priloga, dotacija, donacija i kotizacija
- projektnih aktivnosti na osnovu javnih poziva
- na druge načine, u skladu sa zakonom.

Za svoje obaveze Udruženje odgovara svojom cjelokupnom imovinom u skladu sa zakonom. Sredstva Udruženja se mogu koristiti samo za rad Udruženja.

Član 31.

Udruženje osigurava evidentiranje materijalno-finansijskog poslovanja u skladu s propisima.

Prihodi se raspoređuju prema djelatnostima i programskim aktivnostima i zadacima Udruženja.

Pravilnikom o materijalno finansijskom poslovanju bliže se uređuju stjecanje i trošenje sredstava, finansijsko poslovanje i poslovi knjigovodstva.

Član 32.

Sredstvima i imovinom Udruženja raspolaze predsjednik Udruženja.

Udruženje ima transakcijski račun za konvertibilne marke i devizni račun, te vodi poslovne knjige i sastavlja finansijske izvještaje prema propisima kojima se uređuje način vodenja računovodstva neprofitnih organizacija. U skladu s važećim propisima, svake se godine donosi godišnji obračun (završni račun) na način i u rokovima propisanim zakonom i drugim propisima.

8. NAGRADE I PRIZNANJA UDRUŽENJA

Član 33.

Udruženje dodjeljuje nagrade i priznanja pojedincima i institucijama za zasluge u ostvarivanju ciljeva Udruženja.

Način dodjeljivanja nagrada i priznanja kao i njihov sadržaj pobliže se određuju Pravilnikom o nagradama i priznanjima kojeg donosi Upravni odbor.

9. JAVNOST RADA I INFORMISANJE

Član 34.

Rad Udruženja je javan.

Javnost rada osigurava se u okviru Udruženja i u sredstvima javnog informisanja, službene *web* stranice i službenog profila na društvenim mrežama, a naročito o djelatnostima Udruženja i događajima od šireg kulturnog, stručnog i društvenog značenja.

Obavijesti za javnost u medijima u pravilu daje predsjednik Udruženja, ali to mogu dati u zajedničkoj koordinaciji i dva potpredsjednika, predsjednik Skupštine ili predsjednik Upravnog odbora.

10. POSTUPAK ZA DONOŠENJE STATUTA, IZMJENA I DOPUNA STATUTA I DRUGIH OPĆIH AKATA UDRUŽENJA

Član 35.

Statut Udruženja donosi Skupština na prijedlog Upravnog odbora. Nacrt Statuta dostavlja se na javnu raspravu članovima Udruženja. Sve primjedbe i prijedloge razmatra Upravni odbor i dostavlja Skupštini Udruženja na razmatranje i usvajanje.

Član 36.

Izmjene i dopune Statuta vrše se na način i po postupku predviđenom za njegovo donošenje.

Inicijativu za izmjene i dopune Statuta mogu dati predsjednik Udruženja, Upravni odbor i najmanje 1/3 delegata u Skupštini.

Član 37.

Tumačenje odredaba Statuta daje Skupština.

Član 38.

Akte koji se odnose na rad Skupštine donosi Skupština.

Akte koji se odnose na rad organa, stručnih aktiva i savjeta Udruženja, kao i druge akte koji pobliže određuju pojedine segmente rada Udruženja donosi Upravni odbor.

11. UVJETI I NAČIN UČLANJENJA U UDRUŽENJE, PRESTANAK ČLANSTVA, KAO I PRAVA, DUŽNOSTI I ODGOVORNOSTI ČLANOVA UDRUŽENJA

Član 39.

Članstvo u Udruženju je dobrovoljno i jednako za sve članove.

Članom Udruženja mogu postati muzički/glazbeni i baletni pedagozi i reproduktivni umjetnici, djelatnici obrazovnih i kulturnih institucija u Federaciji Bosne i Hercegovine.

Izuzetno, Upravni odbor može prihvatiti ili pozvati u članstvo i osobe izvan struke bitne za rad Udruženja.

Za stupanje u članstvo Udruženja podnosi se pristupnica na propisanom obrascu.

O svim članovima Udruženja vodi se knjiga evidencije.

Član 40.

Članovi Udruženja su: redovni članovi i počasni članovi.

Redovni članovi Udruženja dužni su plaćati članarinu na mjesečnom ili godišnjem nivou.

Član 41.

Počasni članovi Udruženja su lica koja su zaslužna za rad i razvoj Udruženja, kao i uvažene ličnosti iz kulturnog i javnog života. Odluku o počasnom članu donosi Skupština na osnovu pisanog prijedloga predsjednika Udruženja.

Počasni članovi, učestvuju u aktivnostima Udruženja prema pozivu i svojim mogućnostima, ne plaćaju članarinu i ne sudjeluju u odlučivanju u organima Udruženja.

Član 42.

Redovni članovi Udruženja imaju sljedeća prava i obaveze:

- da učestvuju u radu Udruženja i organa Udruženja
- da aktivno rade na ostvarivanju programskih ciljeva i djelatnosti Udruženja
- da daju prijedloge i podnose inicijative
- da budu informisani o radu i aktivnostima Udruženja
- da odgovorno izvršavaju postavljene im obaveze
- da u svom radu poštuju Statut i ostala akta Udruženja i odluke nadležnih organa Udruženja
- da redovno plaćaju članarinu Udruženja.

Član 43.

Članstvo u Udruženju prestaje:

- istupanjem člana iz Udruženja
- smrću člana
- prestankom plaćanja članarine duže od 12 mjeseci
- isključenjem iz Udruženja
- prestankom rada Udruženja.

Član 44.

Član Udruženja može biti isključen iz Udruženja ako:

- teže povrijedi odredbe ovog Statuta ili drugih općih akata Udruženja
- djeluje protivno ciljevima i interesima Udruženja
- ne poštuje odluke organa Udruženja
- svojim ponašanjem grubo narušava ugled Udruženja.

Član 45.

Obrazložen prijedlog za isključenje člana zbog jednog ili više razloga propisanih u prethodnom stavu, može podnijeti svaki član ili organ Udruženja. Prijava se podnosi Etičkom odboru.

Odluku o isključenju donosi Upravni odbor na prijedlog Etičkog odbora.

Protiv odluke o isključenju može se podnijeti prigovor u roku od osam dana Skupštini. Odluka Skupštine donesena po prigovoru je konačna.

12. PRESTANAK RADA UDRUŽENJA

Član 46.

Udruženje može prestati sa radom pod uslovima i na način utvrđen Zakonom o udruženjima i fondacijama („Službene novine F BiH” broj: 45/02 i 85/07). Organ nadležan za donošenje odluke o prestanku rada Udruženja je Skupština, koja takvu odluku može donijeti na način i po postupku utvrđenom odredbama ovog Statuta koje se odnose na rad i odlučivanje Skupštine.

Član 47.

U slučaju prestanka rada Udruženja, njegova materijalna sredstva raspoređuju se u skladu sa odlukom Skupštine.

13. PRELAZNE I ZAVRŠNE ODREDBE

Član 48.

Ovaj Statut stupa na snagu danom donošenja.

Član 49.

Stupanjem na snagu ovog Statuta prestaje važiti Statut Udruženja muzičkih/glazbenih i baletnih pedagoga u Federaciji Bosne i Hercegovine, broj: 01-2/09 od 21.11.2009. godine.

Broj: 25/2-26

Sarajevo, 27.03.2026. godine

 PREDSEDNIK SKUPŠTINE UDRUŽENJA


Prof. dr. Senad Kazić